

# 1 Tīmoteo

## ingante Pabodo cadota ante tānota nānō yewæmōngainta

### *Tīmoteo ingante Pabodo yewæmōngampa*

<sup>1</sup> Botō Pabodobo inōmo imopa. Itota Codito nānō nē da godongaīmo imopa. Itota Codito waa pōni nānō inō bai mōnō adobai bacæmōimpa, ante pōnēmōmpa. Inique Itota Codito mōnō nē pōnēnōngā tōnō Wængonguī mōnō imonte nē Ængaingā tōnō botō imote āna ēññōmote da godōna godīmo imopa. <sup>2</sup> Tīmoteo ēñēmi, Bitō acæbiimpa, ante bitō imite yewæmōmopa. Edæ mōnō wede pōnēnō ante apænebo nē ēñēnīmi inte bitō Itota Codito quīmi badinque nāwā botō wēmi bai inōmi imipa. Inique botō, Mæmpo Wængonguī tōnō Awēnē Itota mōnō Codito tōnō bitō imite waadete pōnō waa cæda ate bitō gānē entawencæbiimpa, āmopa.

### *Wadāni wapiticæ nāni odōmonte apænedō*

<sup>3</sup> Botō Māatedōniabæ iñōmō pōnīnque bitō imite, Epeto iñōmō ee ongōe, nanguī antabopa. Māniñōmō wadāni babæ wapiticæ nāni odōmonte apænedō ante nē odōmonte apænedōnāni inānite bitō, Mīnitō godōmenque mānīnō ante odōmonte apænedāmaī iedāni, ante āmi ēñencædānimpa. Mānōmānō ante do botō ānīnō bai ñōwo adodō ante bitō imite āmopa. <sup>4</sup> Ayæ, Dodāni ōnonque ante nāni tedegainō ante pōnēnāmaī quēwēedāni, ante bitō ancæbiimpa. Ayæ adobai tōmēnāni wæmæidi

tæiyænāni ante pönēninque, Æmönānidö ingainānii, ante ancaa anewēñönāni bitö tömēnāni inānite, Minitö mäninö ante pönēnāmaï iedāni, ancæbiimpa. Edæ mäninö nāni tedewēnö beyæ tömēnāni, Æbānö i, ante nanguï wæætedö wææte anewēnānipa töö. Wææte edæ, Wængonguï nānö cædö ante wede pönēninque mönö cæquēnēnö guiquēnē tömēnāni nāni tedewēnö beyæ pönömenque cætimpa.

<sup>5</sup> Mänömainö ante äninque botö, Tömēnāni mimö iïmaï entawēninque waadete pönencædānimpa, ante ämopa. Edæ mimö waëmö pönï entawēninque tömēnāni Wængonguï ingante wede nāni pönēnö beyæ waadete pönencædānimpa. Ayæ adobaï nāmā apænte adinque wentamö mongænāmaï entawēnāni inte tömēnāni waadete pönencædānimpa. <sup>6</sup> Iñæmpa pancadāniya mäninö ante eñēninque Baa ante ñimpo cæte wadæ godinque önonque ante quēwēnānipa. <sup>7</sup> Möitee wodi nānö wææ yewæmongainö ante odömonte apæneinēmönipa, ante nē änāni incæ tömēnāni nāni odömonte apæneyedē quinö apænedānii, ante eñēnāmaï inānipa töö. Adobaï quiēmē ante apænedinque tömēnāni, Iïmaï impa, iïmaï impa, ante apænedāni incæte eñēnāmaï ināni inte apænedānipa.

<sup>8</sup> Möitee wodi nānö wææ yewæmongainö ante adinque nöingä cæmö ininque mäninö tömengä nānö wææ angainö iñömö waa ante imaimpa, ante do eñēmompā. <sup>9</sup> Möitee wodi nānö wææ yewæmongainö ante Wængonguï wii nē nö cædāni beyæ pönö wææ angacāimpa. Wææte nē eñēnāmaï cædāni tönö wadāni mäninö ante eñēnāni incæ nē godömenque wēnæ wēnæ cædāni

tönö tömënäni beyæ pönö wææ angacäimpa, ante do ëñëmompä. Ayæ adobaï Wængonguï ingante Baa ante nē quēwënäni tönö wënæ wënæ cädäni beyæ wææ angatimpa. Nē tæiyæ waëmö entawënämaï inönäni beyæ ayæ adobaï Wængonguï ingante nē badete todönäni beyæ wææ angatimpa. Mæmpocä ingante wäänä inante nē wænönäni beyæ ayæ adobaï waocä ingante nē püinte wænönäni beyæ wææ angatimpa. <sup>10</sup>Nänöogængä inämaï iñongante nē towënäni beyæ ayæ adobaï onguïñænäni nänä onguïñæncaya guëa towënäni beyæ wææ angatimpa. Nē cæte quēwengä bacæcäimpa, ante waocä ingante nē godonte ænäni beyæ ayæ adobaï nē babæ änäni beyæ wææ angatimpa. Wadäni inänite, Nö ämönipa ëñëedäni, ante nē babæ änewënäni beyæ ayæ adobaï nö odömonte apænedö incæ nē wadö ante cädäni beyæ wææ angatimpa. Mäninäni tömänäni ëñencädänimpa, ante Wængonguï mäninö ante pönö wææ angacäimpa, ante ëñëmompä.

<sup>11</sup>Edæ Wængonguï ñäö apäite ëmongampa, ante odömonte apæñecæbiimpa, ante tömengä nē waa inongä inte edæ tömengä watapæ nänö apænedö ante pönongä æntabopa. Ayæ nö nänö odömonte apænedö ante Wængonguï nänö pönö angainö ante adodö änö impä.

*Wængonguï waadete nänö pönö cädö ante*

<sup>12</sup>Itota Codito mönö Awënë pönö cæcä beyænque botö tæi ewocabo batabopa. Tömengä iñömö botö imote waa adinque, Bitö nē pönëmi inte cöwë ædæmö cæbi imipa. İinque bitö botö beyæ wadäni inänite nē cæbi bacæbiimpa, ante

pönö cægacäimpa. Mänömaï beyæ botö tömengä ingante waa ate pönente apænebopa. <sup>13</sup> Botö wëenëñedë Itota Codito ingante nê godö babæ ante änewengäïmo ïmopa. Tömengä ingante nê pönënäni inänite wënæ wënæ cæquïmo, ante nê togænömo inte botö nê piinte quëwengäïmo ïmopa. Incæte botö nê pönënämaï inömo inte, Quinö cæquïi, ante ëñënämaï inte cæbo adinque Wængongui, Quëwencæbiimpa, ante pönö waadete waa cægacäimpa. <sup>14</sup> Mönö Awënë botö ïmo nanguï waadete pönö cæcä adinque botö Itota Codito nempo quëwëninque nê wede pönëmo badinque nê waadete pönëmo bagaboimpa.

<sup>15</sup> Ìimaï ante nö pönï nani änö näwangä ante impa, ante ämo ëñëmaïminipa. Itota Codito iñömö, Wënæ wënæ cæmini iminite æmo beyænque quëwenguïmini, ante inguipoga wææ pongacäimpa. Tömengä mänömaï cæcä incæte wadäni wënæ wënæ cædäni iñönäni botö tömëmoque godömenque wënæ wënæ nê cægäïmo ïmopa. <sup>16</sup> Mänömaï beyænque tömëmoque godömenque wënæ wënæ cægäïmo iñömote Itota Codito pönö waadete angä beyænque quëwengaboimpa. Wëenëñedë botö bai nê wënæ wënæ cægäinäni inänite adinque Itota Codito, Botö weca cöwë wantæpiyæ nani quëwenguinque pancadäniya botö ïmote pönenguinäni inänipa, ante do ëñengacäimpa. Ìinque tömengä, Botö nê waadete cædinque ee abo ïmopa, ante tömënäni inänite odömoncæte ante cædinque tömengä botö Pabodobo ïmote mänömaï pönö waadete waa cægacäimpa.

<sup>17</sup> Mönö Wængongui iñömö cöwë wænämaï nê

quëwengaingä inongä inte tömengä iincayæ ate adobaï cöwë wænämaï inte Awënë Odeye inongä ingampa. Tömengä awëmö iñömö quëwënongå iñongante mönö waocabo tömengä ingante ædö cæte aquii. Tömengä wæætë tömää në ëñengaingä inongä ingampa. Ìninqe tömengä adocanque Wængonguï inongä iñongante mönö tömengä ingante cöwë waa aquimö anguënë. Tömengä ingante, Bitö ñäö baï ëmömi inömi imipa, ante apænedinqe mönö ñine cædämaï inte cöwë wat-apæ angæimpa. Cöwë iïmaï babaimpa, ante Amëë, ämopa.

<sup>18</sup> Timoteo, botö wëmi ëñëmi. Në pönënanï wëenëñedë Wængonguï beyæ apænedinqe bitö imitedö ante nani angainö baï adobainö ante apænedinqe botö iïmaï ämopa. Edæ tömënanï nani angainö ante ëñente cædinque bitö tontadoidi nani cæbaï adobaï bitö cæquënëno ante guiñënamäi inte wæætë tæi ewocate nanguï cæcæbiimpa. <sup>19</sup> Wængonguï ingante cöwë wede pönente incæbiimpa. Adobaï mimö entawëmi inte nämä apænte pönëninque wentamö mongænämäi inte bitö cöwë quëwencæbiimpa. Edæ mïni pönencabo iñöminite pancadäniya nämä apænte änämäi inäni inte Codito ingante nani pönëninö ante dobæ ñimpo cæte wadæ godänimpa. <sup>20</sup> Ìimëneo tönö Adecantodo adobaï Wængonguï ingante ñimpo cædinque wadæ godatapa. Ìninqe, Tömëna, Wængonguï ingante mönö wënæ wënæ ante babæ änämäi ingæimpa, ante ëñencædaimpa, ante cædinque tömëna inate Tatäna nempo pædæ godontabopa.

## 2

### *Wængonguī ingante mōnō iīmaī apænecæimpa*

<sup>1</sup> Mini pōnencabo iīnōmīnite botō tāno iīmaī āmopa. Wængonguī ingante mini apæneyedē quiēmē mīni æinēnō ante apænecæmīnimpa. Tōmengā ingante waa ate pōnente apænedinque waodāni tōmānāni beyæ ante apænecæmīnimpa āmopa. <sup>2</sup> Awēnē odeyeidi incæ pōnōmenque awēnēidi tōmānāni incæ mōnō imonte waa aayōnāni mōnō piyænē cæte quēwengæimpa, ante cædinque mīnitō tōmēnāni beyæ ante Wængonguī ingante apænecæmīnimpa. Edæ Wængonguī ingante mōnō cæquēnēnō ante ayæ waodāni inānite mōnō cæquēnēnō ante mōnō waa cæte quēwencæmōimpa, ante Wængonguī ingante awēnēidi beyæ ante apænecæmīnimpa. <sup>3</sup> Mānōmainō ante mōnō apænedō iīnōmō waa impa. Wængonguī mōnō imonte nē Ængāingā inongā inte māninō mōnō apænedō ante waa acampa. <sup>4</sup> Waodāni tōmānāni nāwangā botō angaiñō ante ēñencædānimpa, ante Wængonguī pōnō ængā beyænque quēwencædānimpa, ante nē waa cæinēnongā ingampa.

<sup>5</sup> Edæ adocanque Wængonguī inongā ingacāimpa. Tōmengā waodāni inānite adinque, Wadāni bai inānipa, ante nānēnē quēwengacāimpa. Iīnque Itota Codito nē Waocā ēñagaingā inte tæcæguedē adocanque nē pongā inte, Waodāni Wængonguī guidēnāni badinque adoyōmō bee tente godongāmæ quēwencædānimpa, ante pōnō cægacāimpa. <sup>6</sup> Tōmengā iīnōmō mōnō imonte ante godonte æncæte ante cædinque nāmā wepæ incæ

godoncæte ante nē pongä ingacäimpa. Wængonguï, Iïönæ, ante nänö angaiönæ incæ iinque bayonte mäninö Codito nänö cægainö ante, Nö impa, ante tömänäni inänite nē odömongä ingacäimpa. <sup>7</sup> Mäninö ante bitö nē apænebi bacæbiimpa, ante Wængonguï botö imote angä eñëninque botö tömengä nänö nē da godömo batabopa, ante näwangä ämopa. Edæ babæ änämaï imopa. Ayæ näwangä mönö pönönö ante Wængonguï, Wadäni oodeoidi inämaï inäni adobaï pönencädänimpa, ante cædinque botö imote angä eñëninque botö tömengä nänö nē odömonte apænedömo imopa.

<sup>8</sup> Wayömö wayömö godongämæ mini pönencabo ongonte minitö onguïñæmini iñömö nē püinämaï imini inte Wængonguï ingante apænemini adinque botö waa tobaïmopa. Wadäni inänite nē piinte wæætedö wææte änämaï inte wææte tæiyæ waëmö entawëmini inte Wængonguï ingante pædæ æmpote apænecæminimpa, ante aïnëmopa.

<sup>9</sup> Ayæ onquiyæmini iñömö waëmö weocoo mongæmini incæte minitö, Botö waëmö weocoo mongæmo adinque wadäni botö imote waa acädänimpa, ante änämaï inte nämä baö ante guïñëñate pönëninque weocoo ædæmö wëñate mongæncæminimpa. Minitö ocaguï que que cæmini incæte oodo badöi tönö pededamö nani ämö wente cädämaï incæminimpa. Waëmoncoo nani nanguï godonte ænincoo nani waa acoo ante minitö mongænämaï incæminimpa. <sup>10</sup> Wææte edæ Wængonguï ingante, Bitö Wængonguï Awënë imidö angüenë, ante nē watapæ apænemini imini iinque minitö mini apæneï bai cædinque mini waa cæquënönö ante pönencæminimpa.

Mänömaïnö ante pönente quëwencæminimpa, ante adobaï ainëmopa. <sup>11</sup> Wadäni apæneyönäni minitö onquiyæmini tededämaï inte ëamonca ongonte ëñencæminimpa. Ayæ në ämöni möni änö ante ëñëninque wadö pönënämaï inte do ëñente cæcæminimpa, ämopa.

<sup>12</sup> Godongämæ mini pönencabo weca ongonte minitö onquiyæmini iñömö odömonte apænedämaï incæminimpa, ante botö wææ ämopa. Ayæ adobaï onguïñæmini iminite onquiyæmini iñömö, ïïmaï cæedäni, ante änämaï incæminimpa, ante wææ ämopa. Wæætë tededämaï ëñencæminimpa.

<sup>13</sup> Wængonguï edæ onguïñængä Adäö ingante täno badöninque ayæ onquiyængä Eba ingante badongacäimpa. <sup>14</sup> Ayæ Tatäna wïi Adäö ingante wapiticæ mäocä oda cægacäi. Wæætë Eba ingante æpiticæmë mäocä oda cædinque do wënæ wënæ cæcä bagacäimpa. <sup>15</sup> Incæte onquiyænäni Wængonguï ingante godömenque pönëninque cöwë waadete pönënäni inönäni inte në nö pönente tæiyæ waëmö entawënäni ininque tömënäni wëñænäni inänite mäñönänite Wængonguï wææ aacä beyænque quëwencædänimpa, ämopa.

### 3

#### *Godongämæ mönö pönencabo iñömonte në aadäni*

<sup>1</sup> ïïmaï ante näni änö nö pönï ante impa. Godongämæ mönö pönencabo iñömonte, Aacæboimpa, ante në angä iñömö tömengä waa cæquinö ante pönö cæinengä ingampa. <sup>2</sup> Incæte wadäni, Wënæ wënæ cæcä ingampa, ante änämaï incædänimpa, ante cædinque në aacä



wæætē waa quēwenguēnengā ingampa. Edæ tōmengā nānōogænā adodanque nē manguiwengā incæcāimpa. Tōmengā tōō pōnente nō quēwengā incæcāimpa. Nōinō cæcæimpa, ante pōnēninque nāmā wææ ante nē cæcā incæcāimpa. Waodāni botō imote waa acædānimpa, ante cædinque waa quēwencæcāimpa. Waodāni inānite, Botō oncōnē pō cæedāni, ante cōwē nē watapæ angā incæcāimpa. Ayæ tōmengā nē waa odōmonte apænecā incæcāimpa. <sup>3</sup> Nē aacā tī nāmæ bete beyæ quidi quidi dowænāmaī quēwenguēnengā ingampa. Wacā ingā do pīinte cædāmaī inongā inte wæætē ædæmō cæcā inte quēwencæcāimpa. Tōmengā piyænē cæcā incæcāimpa. Tōmengā godonte nāni æinta ante waadete pōnente wædāmaī incæcāimpa āmopa.

<sup>4</sup> Nē aacā tōnō godongāmæ quēwēnāni inānite tōmengā waa aaquēnengā ingampa. Tōmengā wēñænāni inānite ædæmō aacā beyæ tōmēnāni wæætē tōmengā ingante waa adinque tōmengā nānō ānō ante ēñente cæte quēwencædānimpa. <sup>5</sup> Edæ nē aacā tōnō godongāmæ quēwēnāni inānite tōmengā wīi waa aacā ininque Codito ingante godongāmæ mōnō pōnencabo iñōmonte ædō cæte waa aacā inguingāā.

<sup>6</sup> Itota Codito ingante ñōwo tæcæ pōnēningā wīi nē aacā baquēnengā ingampa. Edæ mānōmaī inongā iñongante mīnitō, Nē aabi imipa, āmīni ininque tōmengā nāmā incæ, Adoboque waa cæbo imopa, ante pōnengā imaingampa. Wēnæ awēnē mānōmaī pōnengā beyænque Wængonguī tōmengā ingante apænte nānō panguinō bai nē aacā ingante adobai apænte pāmaingampa. <sup>7</sup> Ayæ adobai

Itota Codito ingante nē pōnēnāmaī ināni nē aacā ingante adinque, Tōmengā nē waa cēcā ingampa, ante acædānimpa, ante cædinque tōmengā waa quēwenguēnengā ingampa. Tōmengā waa cædāmaī ingā adinque tōmēnāni wæætē, Tōmengā wēnæ wēnæ cēcā ingampa, ante pīlmainānīpa. Tōmengā waa cædāmaī ingā pīlnāni ininque wēnæ awēnē iñōmō, Tōmengā oda cæcēcāimpa, ante godō cēcā ate tōmengā do wēnæ wēnæ cēcā babaingampa.

*Mōnō pōnencabo tōnō godongāmæ nē cædāni*

<sup>8</sup> Mōnō pōnencabo tōnō godongāmæ nē cædāni iñōmō adobaī, Mōnō eyepæ cæte quēwēmō ininque wadāni mōnō imonte waa acædānimpa, ante cædinque waa quēwenguēnēnāni inānīpa. Nē cædāni nāmā nāni ānō baī ante nō cæcædānimpa. Tōmēnāni yowepæ wædænque tī nāmæ biinōmæ nāni āmæ wīi nanguī becædānimpa. Babæ cæmōni incæte godonte nāni æinta cōwē godōmenque æncæmōnimpa, ante wadāni nāni pōnēwēnonque ante iināni wæætē mānīnō ante pōnēnāmaī incædānimpa. <sup>9</sup> Edæ nāmā apænte pōnēninque wentamō mongænāmaī entawēnāni inte tōmēnāni Wængonguī nānō wē wodonte angainō ante tæcæ ēñēninque tōmēnāni, Nō pōni mōnō pōnēnō impa, ante cōwē wede pōnenguēnēnāni inānīpa. <sup>10</sup> Ayæ mānīnāni inānite mīnitō, Quinō cæmīni imīnī, ante ēñencæte ante cōwā acæmīnimpa. Ayōmīni tōmēnāni cōwē waa cæte quēwēnāni adinque mīnitō wæætē tōmēnāni inānite, Mīnitō mōnō pōnencabo tōnō godongāmæ nē cæmīni bacæmīnimpa, ante āmīni bacædānimpa.

11 Tömēnāni nānōgæidi inānite wadāni waa acædānimpa, ante cædinque adobaī eyepæ cæte waa quēwenguēnēnāni inānipa. Mānīnāni iñōmō wadāni inānitedō ante babæ ānāmaī incædānimpa. Wæætē adodāni cōwē tōō pōnente nō quēwēnāni incædānimpa. Tömēnāni cōwē pōnēnīnque, ĩmaī cæcæmōnimpa, ante nāni ānīnō baī ædæmō cæcædānimpa. 12 Mōnō pōnencabo tōnō godongāmæ nē cæcā iñōmō tōmengā nānōgæānā adodanque nē manguiwengā incæcāimpa. Tōmengā wēñænāni inānite ayæ tōmengā tōnō godongāmæ quēwēnāni inānite tōmengā nē waa aaquēnengā ingampa. 13 Mōnō pōnencabo tōnō godongāmæ nē cædāni iñōmō, Nē waa cædināni inānipa, ante adinque mōnō tōmēnāni inānite waa āmōmpa. Ayæ mānōmaī waa cædināni inte mānīnāni, Itota Codito ingante pōnēedāni, ante guīñēnāmaī apænecædānimpa.

*Wē wodonte nāni angainō edonque pōni batimpa, ante*

14 Quingæ bitō weca acæ poncæboimpa, ante pōnēmo incæte botō, ĩmaī cæe, ante bitō imite yewæmōmopa. 15 Botō wæætē wīi quingæ pōmo ĩnīnque bitō, Mōnō Wængongui tōnō godongāmæ quēwencabo inōmō inte mōnō æbānō cæquīi, ante bitō ēñencæbiimpa, ante yewæmōmopa. Edæ Wængongui nē Quēwengāingā quīmō inōmō inte mōnō Codito ingante godongāmæ mōnō pōnencabo iñōmō mōnō cobacadewæ tæi ongō baī tōmengā nō nānō angainō ante ñimpo cædāmaī inte wæætē wææ cæmō imōmpa. 16 ĩmaī ante nō pōni impa. Wængongui ayongā mōnō æbānō waa

cæte quëwenguï, ante Wængonguï wë wodonte nō nänō angainō incæ ñöwoyedē edonque pōni mönō ëñenō iñömō waa pōni impa. Iïmaï impa.

Wængonguï inguipoga iñömō ponte ëñadinque  
Waocä bacä agadänimpa.

Tömengä ingantedō ante Wængonguï Önöwoca,  
Mäningä waëmō quëwënogä ingampa,  
angacäimpa.

Tömengä ingante Wængonguï anquedoidi do  
agadänimpa.

Wabæca wabæca nāni quëwencabo inänite Itota  
nänō cægainō ante apænegatimpa.

Tömämæ quëwënanī pancadäniya tömengä ingante  
pönente bagadänimpa.

Ayæ tömengä ñäo bai ëmöninque öönædē iñömō  
ocæ ëmænte gogacäimpa.

Mänömainō ante nāni ämotamini änō bai impa.

## 4

*Në pönënanī pancadäniya wadæ goquïnāni  
inänipa, ante*

<sup>1</sup> Wængonguï Önöwoca iïmaï ante edonque pōni apænecampa. Iïnque iïönæidi bayonte Codito ingante në pönënanī incæ pancadäniya ñimpo cæte tömengä ingante pönënamäi bacädänimpa. Iïnque önöwocaidi incæ në, Wapiticæ oda cæcädänimpa, ante në wënæ wënæ cædönāni miñæ tee empo gocädänimpa. Goyönāni wënæidi nāni odömonte apænewënō ëñente cæquïnāni inänipa. <sup>2</sup> Në babæ änāni në wadö tedete wadö cædāni iñömō tömënāni mäninō wënæidi nāni odömonte apænewënō ante në odömonte apænedāni inänipa. Iïnāni

guiquënë tōmēnāni nāmā nāni apænte pōnēnō ante ōmætawēnāni inte wēnæ wēnæ nāni cædinō ante wædāmaī quēwēnānīpa. <sup>3</sup> Mānināni iñōmō waodāni inānite wææ ānīnque, Mīnitō, Botō nānōogængā, ante onquiyængā ingante mōnāmaī iedāni, ānānīpa. Ayæ adobaī mōnō waa cænguī adīnque pancaa ante, Cænāmaī iedāni, ante wææ ānānīpa. Iñæmpa Wængonguī edæ tōmāā cænguī badongacāīmpa. Tōmengā, Botō imote waa ate pōnente apænedīnque nē pōnēnāni iñōmō botō nō angainō ante ēñēnōnāni inte cænguī ænte cæncædānīmpa, angampa.

<sup>4</sup> Edæ Wængonguī nānō badongaincoo tōmancoo waa pōnī ī iñonte mōnō Wængonguī ingante waa ate pōnente apænedīnque tōmāā cænguī æmō īīnque pancaa ante ædō cæte Baa ante ænāmaī īngūī. <sup>5</sup> Iñæmpa Wængonguī nānō angainō beyænque ayæ tōmengā ingante waa ate pōnente apænemō beyænque tōmāā cænguī iñōmō tæiyæ waēmō cænguī bapa.

### *Itota Codito ingante nē waa cæcā*

<sup>6</sup> Bitō godongāmæ mīni pōnencabo iñōmīnite bitō mānīnō botō ānō ēñēnīnque bitō tōniñadāni inānite wæætē odōmōmī īīnque Itota Codito beyæ nē waa cæquīmī incæbiīmpa. Ayæ Wængonguī nānō angainō ante mōnō pōnēnō ante ēñente quēwēnīnque bitō waa mōnō odōmonte apænedō ante nē ēñente cædīmī inte edæ tōmo cænte baī nē nō cæbi incæbiīmpa.

<sup>7</sup> Babæidi baī nē tedewēnāni inānite ēñēnāmaī inte bitō onquiyænāni picænāni incæ ōnonquedō ante nāni tedewēnīnō ante ēñēnāmaī incæbiīmpa.

Wæætē, Wængonguī ayongā mōnō waa cæte quēwencæte ante cædinque bitō iñōmō tæi ēwocabo badinque cæcæboimpa, ante godōmenque godōmenque cæcæbiimpa. <sup>8</sup> Mōnō baō tææmō bacæimpa, ante cædinque mōnō ñimpo cædāmaī inte adodō adodō cæmompā. Mānīnonque ante mōnō cædō guiquēnē wædænque waa impa. Wæætē Wængonguī ayongā mōnō waa cæte quēwēmō ininque mōnō ñōwoyedē waa quēwēninque adobaī iñcayæ ate waa quēwenguimō incæmōimpa. Ininque mānīnō ante mōnō cæquīnō iñōmō tōmāā beyæ nō waa pōnī i ininque, Mōnō tæi ēwocaquimō, ante cædinque mōnō ñimpo cædāmaī inte adodō adodō cæcæimpa.

<sup>9</sup> Mānōmaīnō ante nō pōnī nāni ānō nāwangā ante impa, ante āmo ēñēmaīmīnīpa. <sup>10</sup> Mānōmaī beyæ tæi piñænīnque nanguī cæmō imompā. Edæ, Wængonguī nē Quēwengāingā beyænque mōnō wat-apæ quēwengæimpa, ante pōnengāimō imompā. Tōmengā iñōmō mōnō waocabo tōmāmō imonte, Quēwenguīmīni, ante nē Ængāingā incæ tōmengā ingante nē pōnēmō iñōmonte nō ængā beyænque mōnō quēwengæimpa.

<sup>11</sup> Mānīnō botō ānō ante bitō tōmēnāni inānite, Iīmaī cæedāni, ante odōmonte apænecæbiimpa, āmopa. <sup>12</sup> Bitō wīi picæmi incæte æcāmenque iñongante bitō, Botō imote piinte adāmaī incæcāimpa, ante pōnente quēwencæbiimpa. Wæætē edæ bitō Wængonguī ingante nē pōnēnāni beyæ ante, Botō cæbaī tōmēnāni adobaī cæcædānīmpa, ante iīmaī cæcæbiimpa. Apænēbi incæ waa cæte quēwēmi incæ waadete pōnēmi

incæ wede pönemi ïmi incæ nö pönente waa cæbi incæ bitö, Botö bai bacædänimpa, ante cædinque bitö cædö ante odömömi adinque tömënäni adobai cæcædänimpa. <sup>13</sup> Botö pönämaï inguinganca bitö ongöñömö ïñömö Wængongui angä ëñente näni yewæmongainö adinque adodö ante ædæmö apænebi ëñencædänimpa. Ayæ Wængongui ingantedö ante apænebi inte odömönte apænebi ëñencædänimpa. Mäninonque cæte ongoncæbiimpa. <sup>14</sup> Mini pönencabo ïñömönte nê aadäni näni Picæncabo ïñömö bitonga gampo cædinque Wængongui beyæ apænedinque bitö ïmite, Bitö nê aabi badinque nê odömönte apænebi bacæbiimpa, ante pönö apænedänitapa. ïninque bitö do nê aabi badinque nê odömönte apænebi bagaïmi inte godömenque godömenque cæcæbiimpa.

<sup>15</sup> Edæ waodäni tömänäni bitö æbänö godömenque waa cæbi ïmi adinque ëñencædänimpa, ante cædinque bitö mäninonque ante pönëninque godömenque godömenque cæcæbiimpa. <sup>16</sup> Bitö quëwënö ante, Æbänö quëwëmoo, ante nämä wææ aacæbiimpa. Ayæ bitö odömönte apænedö ante, Botö nö pönëninque odömönte apænecæboimpa, ante wææ cæcæbiimpa. Edæ mänömaï cæte wæntædämaï inte cöwë cæcæbiimpa. Bitö mänömaï cæbi ïninque tömëmi nämä incæ wantæpiyæ quëwencæbiimpa. Bitö odömönte apæneyömi nê ëñënäni ïñömö adobai bitö cædö beyænque wantæpiyæ quëwencædänimpa.

## 5

*Nê pönënäni ïnänite æbänö cæcæbiimpa, ante*

1 Onguiñængä picængä wënæ wënæ cæcä incæte tömengä ingante piinte änämaï incæbiimpa. Wæætë tömëmi mæmpocä ingante ante bai tömengä ingante waadete ämi eñencæcäimpa. Edëninäni iñömö tömëmi biwïidi inänite ante bai tömënäni inänite waadete ämi eñencædänimpa. 2 Onquiyænäni picænäni iñömö tömëmi wäänä inante ante bai bitö tömënäni inänite adobai waadete ämi eñencædänimpa. Ayæ baquedäni iñömö tömëmi biwinquëidi inänite ante bai tömënäni inänite waëmö mïmönë waadete ancæbiimpa.

3 Owæmpoïnäni në näwangä ömæpodäni inte quëwënänipa, ante tömënäni inänite waa adinque pönö cæcæbiimpa. 4 Incæte owæmpoingä wëñænäni næængä iñinque nänömoidi næængä iñinque mäninäni wæætë tömengä beyæ cæquënänänipa. Edæ mäninäni täno tömënäni tönö godongämæ quëwënäni inänite waa adinque näëmæ nani cæquënönö ante, Æbänö cæquïi, ante eñente cæcædänimpa. Mänömaï cædinque tömënäni mæmpoidi tönö mæmæidi tömënäni inänite waadete nani cædi bai iñäni adobai mæmpoidi tönö mæmæidi inänite näëmæ waadete cæcædänimpa. Edæ mänömaï cædäni adinque Wængongui waa acæcäimpa. 5 Në nö ömæpocä inongä inte adodanque quëwengä iñinque tömengä në owæmpoingä inongä inte Wængongui beyænque watapæ quëwengæimpa, ante pönengä ingampa. Itädë incæ woyowotæ incæ tömengä ñimpo cædämaï inte, Botö beyæ cæquïmi, ante Wængongui ingante apænete quëwengampa. 6 Wæætë owæmpoingä tote quëwengæimpa, ante nämanque



pönente nē quēwēnongā guiquēnē tōmengā mīi quēwengā incæte do wænte bai ingampa tōö.

<sup>7</sup> Tömēnāni inānitedō ante wēnæ wēnæ änāmaī incädānimpa, ante wææ cædinque bitō mäninō botō änō ante adodō ante ämi ēñencädānimpa.

<sup>8</sup> Æcänō guidēnāni inānite pönō cädāmaī inaa ayæ tōmengā nāni wencabo inānite pönō cädāmaī inaa tōmengā iñōmō Wængonguī nānō angainō mönō pönēnō ante do Baa āninqe wīi ēñente cæcampa. Ayæ nē pönēnāmaī ingā wēnæ wēnæ cæcā iñongante māningā iñōmō godōmenque wēnæ wēnæ cæcā ingampa tōö.

<sup>9</sup> Owæmpoinā do tetenta wadepo ganca godōmenque nē picænā inönā inte tōmēnā nānōogængā wodi ingante nē möninanque quēwēnā ingadāimpa, ante adinque bitō, Wængonguī quī, ante mönō godonte æninta mäninā owæmpoinā nē ænguīnā incädāimpa, ante tōmēnā emōwo ante yewæmoncæbiimpa.

<sup>10</sup> Edæ tōmēnā wēñænāni inānite waa cädä pædāni inānitawo. Wadāni inānite tōmēnā, Botō oncönē pō beedāni, ante waa apænedā inantawo. Wængonguī quīnāni iñönānite tōmēnā nāmā pönēnāmaī inte waa cädantawo. Nē wæwēnāni inānite adinque tōmēnā tōmēnāni tönō godongāmæ cädantawo. Ayæ, Quiēmē waa cæcæimpa, ante mäninonque ante pönēninque cæte quēwēnantawo. Mänōmaī quēwēnā adinque waodāni, Mäninā nōinā waa cädä inönampa, ante do ēñēnāni inānitawo, ante adinque bitō wæætē tōmēnā emōwo ante yewæmoncæbiimpa. Ayæ wadāni mäninā bai iñönānite bitō, Wængonguī quī, ante mönō godonte æninta mānimpodānique nē

ænguīnāni incædānimpā, ante tōmēnāni ěmōwo  
ante yewæmoncæbiimpā.

11 Wæætē edæ owæmpoināni wīi picænāni  
iñōnānite bitō tōmēnāni ěmōwo ante  
yewæmōnāmaī inte Baa ancæbiimpā. Ayæ toinente  
wæwēninque Codito ingante ñimpo cæte wadæ  
godinque wæætē, Wacā nānōogængā ingante  
mōinēmopa, ante quēwēnānipa. 12 Edæ tōmēnāni  
Codito ingante, Botō bitō beyænque cæcæboimpā,  
ante tāno nāni angainō ante ñimpo cædāni beyæ  
Wængonguī apænte pangā wæcædānimpā. 13 Ayæ  
godōmenque iīmaī cædānipa. Tōmēnāni cædāmaī  
inte wæntæye badinque adobaī wacōnē wacōnē  
acæte ante ōnonque godāni inānipa tōō. Ayæ wīi  
ōnonque wæntæyedānique badinque tōmēnāni,  
Wadāni æbānō cædāni, ante gote adinque wadāni  
nāni cædōnō ante godō wæntæ godō wæntæ  
tededāni inānipa. Edæ wīi nāni anguēnēnō ante do  
ānewēnānipa. 14 Mānōmaī beyæ botō owæmpoināni  
wīi picænāni inānite iīmaī āmopa. Mīnitō wæætē  
mōninque wēñænāni māedāni. Ayæ oncōnē mīni  
cæquēnēnō ante cædāni. Wadāni edæ mōnō  
imontedō ante wēnæ wēnæ nāni tedewēnō ante  
tededāmaī incædānimpā, ante mīnitō mānōmaī cæte  
waa quēwēedāni, āmopa. 15 Iñæmpa owæmpoināni  
pancadāniya do Itota Codito ingante ěmō cæte  
godinque Tatāna miñæ tee empocæ godānitapa  
tōō.

16 Onquiyængā nē pōnengā iñōmō tōmengā  
guidēnāni owæmpoināni næængā ĩninqe tōmengā  
tōmēnāni beyæ cæcæcāimpā. Codito ingante  
godongāmæ mīni pōnencabo iñōmīnite tōmengā,  
Botō guidēnāni inānite godōmīni æncædānimpā,

ante änämaï incæcäimpa. Mänömaï cædinque Codito ingante mïni godongämæ pönencabo wæætë, Owæmpoinäni näwangä ömæpodäni inänipa, ante adinque tömënäni inänite godömini æncædänimpa, ämopa.

<sup>17</sup> Wængonguï ingante godongämæ mïni pönencabo iñömïnite në aadäni näni Picæncabo iñömö nö waa aadäni iñönänite mïnitö tömënäni inänite waa aquënëmïni iminipa. Mäninäni Wængonguï nänö angainö ante në apænedäni inte ayæ në odömonte apænedäni iñönänite mïnitö godömenque nanguï waa acæmïnimpa. <sup>18</sup> Edæ Wængonguï iïmainö ante apænecä ëñëninque yewæmongadänimpa. “Wagada onguïñængä në cæcä inte tömentapo æ yacæimpa, ante ämi pinä pinä gäwate cægöñongä bitö tömengä önöne wææ wodönedämaï inte ee abi cæncæcäimpa,” ante yewæmongatimpa. Ayæ godömenque iïmaï ante impa. “Në cæcä iñömö tömengä nänö cædinö beyæ ante në ænguënergä ingampa.” Mänömaï yewæmongadänimpa.

<sup>19</sup> Godongämæ mïni pönencabo iñömïni waocä adocanque iñömö bitö imite apænedinque, Mäningä në aacä Picængä iñömö wënæ wënæ cæcantapa töö, ante añongante bitö ëñënämaï incæbiimpa. Wæætë waoda mënaa në babæ wapiticæ änämaï ina inte bitö imite apænedinque, Tömengä në wënæ wënæ cæcantapa, ante adodö apæneda ëñëninque bitö në äna inate ëñencæbiimpa. Ayæ waodäni mengäa go adocanque adobaï adodö apænedäni ëñëninque bitö në änäni inänite ëñencæbiimpa.

<sup>20</sup> Në wënæ wënæ cædönäni incæ ñimpo cædämaï

inānīpa, ante adinque bitō wæætē godongāmæ ongönāni ēñēñōnāni mǎnīnāni inānite nanguī ancæbiimpa. Godongāmæ ongönāni ēñēñōnāni bitō mǎnōmaī āmi īninque tōmēnāni wæætē guīñēninque, Wēnæ wēnæ mōnō cæquīnō ante cædāmaī incæmōimpa, ante pōnencædānīpa.

<sup>21</sup> Mōnō Wængonguī ayongā Itota Codito ayongā Wængonguī nānō apænte ænīnāni anquedoidi ayōnāni botō īmaī āmopa. Mǎnīnō botō ānīnō ante ēñēnte cædinque bitō, Adoyōmō pōnī inānīpa, ante tōmānāni inānite adoyōmō godō cæbi incæbiimpa. Wīi adocanque ingante, Botō nē waa adīmi īmīpa, ante tōmengā ingante wadō cædāmaī incæbiimpa.

<sup>22</sup> Æcāmenque ingante, Mōnō pōnencabo beyæ bitō nē cæbi baquīmi, ante pōnēmi inte bitō tōmengāa quingæ gampo cædāmaī īe. Edæ quingæ gampo cæbi nē cæcā badinque edæ tōmengā wēnæ wēnæ cæcā īninque bitō adobaī tōmengā tōnō wēnæ wēnæ cæbi baquēnēmi īmīpa. Bitō tōmēmīque godōmenque wēnæ wēnæ nāni cæpāmo ante tōmānō ante Baa ante waa cæte quēwēe.

<sup>23</sup> Bitō cæīnca cædente wæbitawo. Ayæ wantæ wantæ īñō wantæ wantæ īñō wēnæ wēnæ inte wæbitawo. īninque wīi æpænque bee āmopa. Wæætē bīīnōmæ wædænque bete quēwencæbiimpa.

<sup>24</sup> Wængonguī nānō apænte anguīōnæ badāmaī īñedē incæ waodāni pancadāniya wēnæ wēnæ nāni cægāinō do edonque pōnī impa. Wadāni guīquēnē wēnæ wēnæ nāni cægāinō wē wodonte ī incæ mǎnīñedē edonque pōnī baquīnō anguēnē. <sup>25</sup> Ayæ adobaī waodāni waa nāni cægāinō do edonque pōnī impa. Ayæ ñōwoyedē pancaa waa nāni cægāinō wīi edonque pōnī ī incæte wīi cōwē wē

wodonte ingæimpa. Wæætē edonque pōni aquinō anguēnē.

## 6

<sup>1</sup> Waodāni awēnēidi nāni nē ð ænināni inte awēnēidi beyænque cæte ñā cæyænte bai nē quēwēnāni iñōmō tōmēnāni tōmānāni awēnēidi inānite waa ēñente cæcædānimpa. Iñæmpa tōmēnāni nē pōnēnāni inte wīi waa ēñente cædāni bai wadāni wæætē Wængonguī ēmōwo ante wēnæ wēnæ ante babæ anguēnēnānimpa. Adobai mōnō odōmonte apænedinō ante, Wēnæ wēnæ impa, ante anguēnēnānimpa. <sup>2</sup> Tōmēnāni awēnēidi iñōmō nē pōnēnāni ināni beyænque nē cædāni iñōmō, Botō tōniñacanque inongā inte botō awēnē iñōmō ðnonganque ingā awædō, ante pīināmaī incædānimpa. Wæætē edæ nē cædāni iñōmō, Botō cæbo nē ængā iñōmō nē pōnengā inongā inte Wængonguī nānō nē waadecā ingampa, ante adinque tōmēnāni awēnēidi inānite godōmenque waa ēñente cæcædānimpa.

### *Nāwā māincoo ante*

Īninqe Tīmoteo ēñēmī. Mānīnō ante tōmēnāni inānite odōmonte apænedinque bitō adodō adodō ante ancaa ancæbiimpa, āmopa. <sup>3</sup> Pancadāniya wadō ante odōmonte apænedinque mōnō Awēnē Itota Codito nō pōni nānō angainō ante Baa ānānipa. Ayæ mōnō odōmonte apænedō ante tōmēnāni Wængonguī ayongā mōnō waa cæte quēwenguēnēnō ante Baa ānānipa. Īninqe æcānō mānōmaī Baa āna iñōmō <sup>4</sup>tōmengā nāmā incæ, Botō gomonga waa ēñēmopa, ante nē pōnēnongā ingā

incæte tōmää eñēnāmaingä ingampa. Tōmengä nāmanque nānō pōnēwēnō ante wæætedō wææte tededinque, Ædedō i, ante wacä tōnō guēadō guēa äinēwente wæcampa. Tōmengä mänōmaï tedecä beyænque wadāni nē gomonga eñengä ingante godō piinte adānipa. Godongāmæ wadodō wadō piinte tedewēnānipa. Wacä ingä wacä ingä, Bitō wēnæ wēnæ cæbi imipa, ante anewēnānipa. Nāmā nāni wēnæ wēnæ pōnēnonque ante, Wadāni wēnæ wēnæ cædānipa, ante pōnēwēnānipa. <sup>5</sup> Ayæ ocaidē pōnente wentamō encadāni inte tōmēnāni Wængonguï nāwangä nānō angainō incæ eñēnāmaï badānipa. Īninqe nāni cabo incæ wacä ingä wacä ingä guēadō guēa apænete nāni piincabo inānipa. Ayæ mänināni adobaï, Wængonguï ayongä waa cæte quēwēmō beyænque nangui ēate baquimō, ante pōnēwēnānipa.

<sup>6</sup> Īñæmpa mäincoo quincoomē ēacä incæte, Mäninque ēabopa, ante piyænē cæte quēwēnongä iñōmō tōmengä Wængonguï ayongä waa cæte quēwengä beyænque watapæ quēwēnongä inte nō nangui ēacä ingampa. <sup>7</sup> Edæ mōnō ii inguipoga iñōmō omaamō pontamompa. Adobaï omaamō inte tao goquimō imompa. <sup>8</sup> Incæte mōnō cængui tōnō weocoo ēamō inte mäninque beyæ mōnō watapæ quēwenguinque imompa. <sup>9</sup> Wadāni guiquēnē, Mäincoo nangui ēainēmōnipa, ante quēwēnāni inte tōmēnāni wēnæ wēnæ nāni cæinēmāmo badinque oda cæte goquinānidō anguēnē. Mänōmaï cædinque tōmēnāni, Quinō ōnonque impa, ante æinente badānipa. Ayæ wēnæ wēnæ nāni baquinque edæ æinēwēnāni inte quiēmē incæ tōmēnāni

æmæwo ömæe nāni ewenguinonque gocædānimpa. <sup>10</sup> Waodāni nāni godonte æinta waadete pönente nāni wædö beyæ wadö wadö nāni wënæ wënæ cæpāmo pompa. Edæ pancadāniya, Mönö godonte ænguinta ængæimpa, ante pönëninque tömënāni nāni wede pönenguënönö ñimpo cæte wadæ godinque nāmā nāni cædö beyænque nangui wæwente badānitapa.

*Mönö wede pönönö ante mönö tæi ewocate cæcæimpa*

<sup>11</sup> Bitö guiquënë Wængonguinque ingante në cædömi inte mäninö tömänö ante ñimpo cæte wodii gote bai quëwencæbiimpa, ämopa. Wæætë mönö nö cæquënönö ante cæte quëwencæbiimpa. Wængongui ayongä mönö waa cæte quëwengæimpa, ante cæcæbiimpa. Mönö wede pönëmāmo, ante godömenque pönente quëwencæbiimpa. Waodāni inānite godömenque waadete pönencæte ante cæcæbiimpa. Ayæ tæi piñante entawëninque wæntæye badāmaï inte ee cæcæbiimpa. Cöwë ædæmö cæte quëwencæbiimpa. <sup>12</sup> Wængongui ingante mönö wede pönönö ante mönö cæquënönö ante bitö tæi ewocate cæcæbiimpa. Mönö wænāmaï quëwenguinö goquimö, ante pönente ñimpo cædāmaï incæbiimpa. Edæ waodāni tæiyænāni eññönāni, bitö, Wængongui ingante wede pönente babopa, ante äñömi Wængongui edæ, Mäninö quëwenguinö gocæbiimpa, ante bitö ïmite apænte aa pecantapa. <sup>13</sup> Wængongui pönö cæcä beyænque quingämenque incæ tömänāni quëwënāni inānipa. Itota Codito iñömö Pontio Pidato ingante apænedinque, Quinö nö impa,

ante edonque pōni apænegaingä ingampa. Edæ Wængonguī tönö Itota Codito mänömainö ingaina iñöna botö tömëna ayöna bitö imite, İımaı cæe, ämopa. <sup>14</sup> Mönö Awënë Itota Codito nänö ocæ emænte ponguinganca bitö mäninö botö wææ änö tömänö ante waa eñente cæcæbiimpa, ämopa. Bitö eñente cædö adinque wadäni ædö cæte, Wënæ wënæ impa, ante anguinänii, ante pönente cöwë waa pōni cæcæbiimpa. Mänömaı ante ämopa.

<sup>15</sup> Wængonguī nänö ainenguiönæ bayonte Itota ocæ emænte poncæcäimpa. Mönö Awënë Wængonguī iñömö tömengä adocanque Wængonguinque ingaingä inte në waa pōni inongä ingampa. Tömënanı awënë odeyeidi iñönänite tömengä Tæiyæ Awënë Odeye inongä ingampa. Ayæ tömengä iñömö awënëidi tömänäni Awënë inongä ingampa. <sup>16</sup> Tömengä adocanque në wantæpiyæ wænämaı inongä inte në Quëwengä ingaingä ingampa. Tömengä tömää ñäö iñömö quëwënogä iñongante waodäni ædö cæte tömengä weca goquinänii. Tömengä mönö waocabo mönö në adämaı ingaingä ingampa. Edæ tömengä ingante mönö ædö cæte aquıı. Tömenganque ingante waodäni tömänäni waa aquinänidö angüenë. Tömenganque cöwë në tæı piñænongä inte quingämenque quëwënanı iñönänite tömengä tömänäni Awënë inguingänö angüenë. Mänömaı babaiimpa, ante, Amëe, ämopa.

<sup>17</sup> Inguipogaque mäincoo në nanguı eädäni inänite bitö İımaı ancæbiimpa. Nanguı eamöni inte mönitö godömenque waa pōni imönipa, ante pönënamäı iedäni. İñæmpa mäincoo mönö eadincoo



iñömö quingæ dæ ä apa quëwënänii. Īninqe mīni mǎincooque ante wīi mǎincooque ante pōnēedāni. Wæætē, Wængonguinque beyænque watapæ quëwengæimpa, ante pōnēedāni, ancæbiimpa, ämopa. Edæ, Mönö quī quīnō dæ ä, ante wæmō adinqe tōmengä mönö ĩmonte, Mīni watapæ quëwenguinque, ante tōmää nē pōnongä ænguimō ĩmopa. <sup>18</sup> Mǎnīnāni nē nanguī ēadāni ĩnānite bitō, Mīnitō quīnō waa cæquīi, ante mǎnīnonque cæcæminimpa, ancæbiimpa. Waa mīni cæquīnō ante mīnitō nanguī cæte quëwencæminimpa. Ayæ do Ao ante mīnitō mǎincoo mīni ēadincoo pancacooga pædæ godōmīni æncædānie, ancæbiimpa, ämopa. <sup>19</sup> Mǎnīnō bai nē cædōnānique, Mönö nāmä beyæ ēaquincoo, ante öönædē iñömö do cō cæte bai cædānipa. Mǎnōmaī cædinque tōmēnāni, Nō pōnī mönö quëwenguinque impa, ante ĩncayæ ate æncædānipa.

*Timoteo ingante, Pabodo ĩnque wææ angampa*

<sup>20</sup> Timoteo ēñēmi. Wængonguī, Wææ aacæbiimpa, ante bitō ĩmite quīnō pōnongä bitō ö ænīnō ante wææ ae. Tæiyæ waëmō ēwocadāmaī inte wadāni önonquedō ante nāni änönö ante ēñēnāmaī ĩe. Adobaī wadāni, Mōnitō ēñente ate nanguī encāimōni ĩmōnipa, ante nē babæ änāni ĩñönānite bitō wadodō wadō nāni änewēnō ante ēñēnāmaī ĩe. <sup>21</sup> Tōmēnāni nāni änewēnō ante pōnēninque waodāni pancadāniya Wængonguī ingante nāni pōnēnīnō ante do ñimpo cædinque wadæ godīnāni ĩnānipa.

Wængonguī	bitō	ĩmite	waadete	pönö
cæcæcäimpa,	ante	botō	māninqe	ante

yewæmōmopa.

**Wængonguī nänö Apænegainö**  
**New Testament in Waorani (EC:auc:Waorani)**

copyright © 2009 Wycliffe Bible Translators, Inc.

Language: Waorani

Translation by: Wycliffe Bible Translators, Inc.

Waorani [auc], Ecuador

**Copyright Information**

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Waorani

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 21 Feb 2024 from source files  
dated 29 Jan 2022

9bedab5a-39ff-5163-a35b-8056cbbe8690